

丁文誠公奏稿

丁文誠公奏稿

卷之十三目錄

接任川督謝

恩摺

光緒三年三月二十八日

到川附陳大概情形片

同日

飭川東道成縣道清理教案片

同日

憑陳川省敗壞情形設法整頓摺

光緒三年五月三十日

曾璧光建祠 宣付史館摺

光緒三年六月二十九日

收復馬邊核桃汛地摺

光緒三年七月二十二日

籌辦黔岸鹽務官運商銷摺

光緒三年七月二十二日

津貼臬司兩首縣公費片

光緒三年七月二十九日

查辦東鄉縣案摺

光緒三年九月初六日

接任川督謝 恩摺 光緒三年三月二十八日

奏爲恭報 微臣 接篆任事日期叩謝

天恩恭摺奏

聞仰祈

聖鑒事竊 臣 渥叨

恩命補授川督上年十二月初三日趨叩

闕廷疊蒙

召見欽承

訓示感悚莫名十二月二十四日跪請

聖安後束裝就道於本年三月二十日行抵成都省城二

十六日准護督 臣 文格將四川總督管巡撫事關防一顆

暨

王命旗牌文卷飭委成都府知府李德良署督標中軍副將琦明齋交前來

臣當卽恭設香案望

闕叩頭祇領任事伏查川省幅員遼闊本極繁庶之區近因兵燹以來元氣較虧民情亦多浮動計惟修明吏治庶期安輯地方其闔省營伍暨留防各處勇營並訓練各兵棋布星羅欲求精勁之師須嚴訓練之法至各廳屬留防各處所轄土司番夷尤在控馭得宜方足以息爭端而靖邊圉

臣質本疏庸懼弗克勝重任所幸面承

聖訓得有遵循自當隨事隨時殫竭血忱悉心經理冀以

仰答

高厚鴻慈於萬一所有微臣接篆任事日期除恭疏題報

外謹恭摺叩謝

天恩伏乞

皇太后

皇上聖鑒訓示再

臣

經過直隸山西陝西各省雨水尙足

二麥有收自入川境以來連日大雨麥收可望卽高地亦
均布種民情尙爲安謐堪以仰慰

宸廑合併陳明謹

奏

到川附陳大概情形片

光緒三年三月二十八日

再川省地方情形

臣自蒙

恩簡任以來凡遇蜀中人士及他省官紳之自蜀中來者旁諮博詢均謂川省吏貪民玩勢成岌岌初以爲言之過甚自入川後卽沿途悉心體察始知該省現在情形真有江河日下之勢人言非虛語也夫川省之壞據目前情形而論其象已見於民而其毒尙種於官臣甫經入川一切細微尙未盡悉第就其顯見者言之通省州縣自實缺以至候補競尙奢靡專工酬應無端浪用相率爲常一過境之差事動費數千金一宴會之酒食輒用數十金彼此效尤誇多鬬靡其所以樂於爲此者在實任則探囊而出轉

向民間加派在候補則稱貸以辦坐俟委署取償故各屬
從前巧立局名陰肆苛斂近因民氣不靖大半已裁惟夫
馬一局藉口辦差仍多存留而營私剝民此爲尤甚查川
省僻處西偏不通大道惟川北一路每年有喇嘛各項差
使過往不能不照常應付此外各屬均無外省來往差使
聞亦多設有局按糧加派夫川省正供而外每年津貼捐
輸兩項計多取於民者約一百四五十萬兩然行之十數
年而百姓尙無咨怨者誠知帑項維艱故雖窮困猶願竭
力輸將以濟

國用也今夫馬局名爲辦差實充私橐民心積忿實由於
此近年屢奉

諭旨飭裁經前督臣吳棠護督臣文格迭次嚴行裁革而各州縣因爲利藪仍多假公濟私此病不除民心終不能靖恐終成爲亂階也若夫詞訟積壓上控繁多緝捕廢弛盜風日熾近日會匪咽喉匪勾結成羣擾害城市經護督臣文格於上年略加懲治稍覺斂迹而氣餒仍未少衰總由各州縣祇知以營私爲能以應酬爲計久不知捕務爲何事故其弊遂至此極也凡此數端臣到省時與藩臬互相考證其弊均不出此夫以一省之大其爲治實不外於用人節費除盜安良四大端得之則理失之則亂其大較也今此數者置之度外概不講求而惟以營私牟利爲務欲地方之不潰敗破裂庸可得乎臣甫經到省目擊事勢如

卷之三
此良深惴惴然既有所見容當詳細審酌分別緩急破除
情面次第認真整理以冀挽回風氣至此外未盡之弊尙
多亦俟隨時細心體察核實辦理庶期仰副

聖明委任之至意謹附片具陳伏乞

聖鑒訓示謹

奏

飭川東道成縣道清理教案片

光緒三年三月二十八日

再教民滋事之案近惟川省爲多而案情輾轉之繁亦惟川省爲最前經迭奉

諭旨飭令持平辦理自應欽遵照辦

臣

於入川後卽經詳

細採訪大約教案滋事之初由教民恃教欺壓平民積漸既深平民不勝其忿遂羣聚而仇殺教民尋仇愈甚則結怨愈深今雖民教仍復相持而教民不敵平民之多教民勢亦少衰此時欲求結案必先解散平民第解散平民尙易爲力然必審察該教民實有自願結案之意卽可乘機辦理否則平民解散而教民又復生枝節致令散而復聚則官不見信於民以後有事更難收拾此

臣

於辦理此案

所以必慎之於始也現在該主教范若瑟於臣到省時趕由重慶前來稟謁臣於其接見之際卽責其在川傳教不能與百姓相安致令教案迭出殊不成事並與言以前各案爲日過久民教均有不合卽應趕緊清結不可再事懸宕該主教唯唯聽命無多置辯似此情形尙可設法逐件清理但不宜操之過急轉滋他慮臣現擬督飭川東道姚覲元署成縣道丁士彬經權互用相機了結以後清結一案卽行隨時具奏以慰

聖廑謹附片具奏伏乞

聖鑒訓示謹

奏

漚陳川省敗壞情形設法整頓摺

光緒三年五月三十日

奏爲漚陳川省敗壞情形現在設法力求整頓恭摺仰祈
聖鑒事竊臣前於奏報到任時業將川省大概積弊附片
陳奏在案然第就臣初入境時沿途見聞所及言之尙未
盡悉其底蘊也自到任後日陪司道逐細推尋接見僚屬
詳加審詢而又參以現時之風氣考其應辦之事宜又於
州縣之稟詳細加披閱以審吏事復於民間之呈訴曲爲
聽受以察衆情兩月以來考核較眞弊端悉露始歎此間
政事替亂法度廢弛有非思議所能及者故不得不爲我
皇太后

皇上漚陳之查川省之於天下盡人所稱爲富饒之區也

及今視之而竊以爲不然臣初到任後首核司庫之所入除丁糧稅課約計百萬外所恃僅鹽貨釐金之一百一十餘萬耳合而計之歲入不過二百一十餘萬而所出則幾至五百萬以入抵出每年實不敷銀二百六七十萬相去甚覺懸殊及詢之歷年籌撥之方則正供之外有按糧津貼計可得六十餘萬津貼不足則又有按糧捐輸計可得八十餘萬卒之常年捐輸而不敷之數仍有一百二三十萬官不得已而取之民不得已而輸之溯自同治元年至今中歷十六年歲以爲常前數年內又歷年有備捐展捐再辦備捐展捐之舉而民力已重困矣夫

國家自軍興以來各省度支除地丁關稅外皆以釐金爲

挹注未聞盡派之捐輸也卽聞有一二辦捐之處亦第勸之於富民未嘗派之於糧戶亦第偶一舉行未嘗歷諸久遠蓋捐輸本不可強之事偶一行之而勸之於富民則尙爲樂輸歷久之而徵之於糧戶則貧富均受其累此病民之甚者也雖然捐輸之事民固病之而利歸於上民猶知急公之義雖勉力供支尙不以爲怨也至有夫馬局之設而各州縣句同局士巧立名目勒派浮攤官取之則別爲夫馬民視之則同一捐輸公私混淆誅求無厭而民乃滋怨矣臣兩月來接收民間呈詞所控夫馬局者不下數百紙率皆浮收濫用初疑所控之未盡實也及札飭各州縣將先後派收夫馬局銀錢數目詳晰稟陳查閱之餘見

有每糧一兩派收銀六七兩制錢八九千不等者較之公派津貼捐輸多數倍而私用日侈猶嫌未足則又以差使爲詞假借墊歸還之名另行按糧加派其散法之甚者則又將津捐暗行挪用病民兼以病

國心竊傷之夫州縣之所以肆意剝民取多而用宏者非盡快一己之私也其中亦實有不得已之應酬而後可以爲自藏之固卽以臣署而論每一節壽之費州縣多者至千金少者亦三四百金而他項之應酬不與焉此外兩司爲數較減費亦不貲上下交爭幾視爲固有自然之利舉國若狂罔計公事於是公項則任其虧挪每遇交代含糊報結臣與藩司考核庫款將從前交代逐細清查正雜則

有虧津捐則有虧釐金則又有虧視官庫若私藏以侵挪
爲得計查川省向無不清之交代今則不能結報者已不
下百數十起庫項虧至數十萬不顧正款而只知腴民欲
民心之不躁動得乎且夫州縣爲親民之官詞訟案件者
生民之大命也近則相率晏安直不知聽斷爲何物虛應
故事積壓日多甚至人命重案不驗不問者有之劫傷重
情不報不緝者有之以致京控上控累百盈千者無從清
釐臣到任後飭查首府發審局僅春季未結積案已多至
一百四十九起此外各屬概可知矣州縣爲一邑之主民
所恃爲安危疲玩至此民將安恃於是地方頑黠之徒漸
生玩易狡焉思啟會匪咽喉充斥於四郊帽頂鹽梟橫行

於各境臣飭查各屬補報從前搶劫拒傷重案不下數百起而成都所屬尤多並聞近年以來距省二十里內外肆行劫殺官吏幾不能過問川省固多盜賊然似此縱橫實亦歷來所未有小盜不治卽大盜之漸實堪隱憂至於綠營氣習以臣視之較之他省尤甚將弁羣習爲因循兵丁日趨於流蕩茶坊之聚會殆無虛日煙館之開設半是營兵所謂操練者初不過奉循故事至於紀律一切殆蔑如矣省營如是外營可知而尤堪恨者弁兵每借營爲護符包庇匪類賊之膽玩多由於此查川省綠營饗糈藩庫支發從無拖欠亦爲近來各省所未有而上下不思整飭坐任頹廢饗項徒糜眞可爲疚心者也若夫留防勇營漫無

統帥零星渙散節制不聞平時之操練彼此既不相習臨事之調遣呼應自不靈通目前馬邊夷務所調勦撫各營日久遷延未能奏效卽坐此病蓋將弁中亦習應酬求將才於人情之中其庸可冀乎又川省邊防極關緊要查川西及西北西南各處界連夷地壤接滇黔年來夷匪出沒無常頗爲民害此固由夷性之不良實亦由撫馭之失術蓋馭夷之法平時則在恩信之相孚有事則貴勦捕之神速今沿邊文武遇事因循不思撫綏之術每任弁兵差役魚肉夷人一旦潰決出擾廳官則只圖遷就以避過將弁則且請添兵以冒饕以致夷人窺見虛實肆行無忌查近年各廳經費遞有加增而夷人益以不靖此則急宜變計

者也凡此以上各情皆川省弊壞之極大者民命

國勢所關綦重若知而不言是欺

君也知之言之而不急思挽救是負

國也臣自受事以來深維扶衰救弊之道非奮迅不克以有爲而操切亦難以圖治因與在省司道酌度時宜權衡緩急爲之立簡易可行之法示堅定不移之操詢謀僉同循次辦理惟以川省民氣之促在於捐輸之數既多捐輸之時過久就目前大勢而論亟應裁撤以恤民生但念京協各饗指撥加增卽現辦捐輸不敷尙鉅若驟然停撤則各營協撥益將無法騰挪故現在情形既當重念民生亦應兼權

國計臣竊以捐輸之病民者在夫馬局之混雜其中致私
派重於公捐故爲害特甚耳若夫馬局立爲刪除則民力
自節省數倍臣現已將該局除雅州至廣元中間經歷十
數州縣係喇嘛藏差必由之道擬爲酌留以資接濟其應
派收錢文均由臣查明道里遠近酌照向派數目核減十
分之八額定實數不准私加違者一經呈控卽行嚴參治
罪此外通省一律裁撤不准別有名目並徧張告示俾民
周知以杜該州縣日後影射巧取之弊有此以紓民力則
捐輸一事俟一二年後再行酌裁百姓亦尙樂輸不致有
異議也夫馮驩見用尙知市義尹鐸治邑不貴繭絲臣實
庸愚上不能爲

國家布寬大之恩疚心曷極惟時當極敝不能不忍以有待耳現計可以濟捐輸之窮者惟釐務爲大宗川省從前抽釐浮費中飽之弊多所不免近年委員抽收又皆定以一年更換事同調劑中飽尤多臣現督飭司道暨釐局委員等詳定新章力加考核比較收數參以最多之年申報款項定以半月爲限並嚴定委員功過信賞必罰俾釐務漸有贏餘則捐輸自可遞減至於交代虧挪實司庫之大病川省近年虧欠現經查明已積欠數十餘萬臣亦嚴飭藩司分別病故參革及現在實任候補各員勒限半年完繳逾限不完卽予參追並將交代之案截清款目妥立章程劃分新案舊案力爲清理現定以光緒三年四月初一

日以後爲新案查辦二參四月初一日以前爲舊案設局清結限期既定恪守不移私室少一分侵挪公家多一分接濟但得庫儲稍裕捐輸又可遞減也若夫詞訟之不理最足以寒良善之心而長奸頑之氣言吏治者此爲大端臣現與臬司明定規條先將各案亦分爲新舊查辦茲定以光緒三年四月初一日以前爲舊案分飭委員赴各屬詳細查造呈送四月初一日以後爲新案按月勒令審結並定以每月新案訊結九成舊案帶結五成如審結不及成數者亦卽分別多少記過撤參又酌定詞訟循環兩簿令各屬按月將收受准理呈詞及審結斷語摘鈔呈閱以查其審理之果否勤速聽斷之能否明允其命盜重案則

勒限三日詳報不准違逾以杜諱匿庶訟獄可以漸清民氣將不戢自靖至囑匪會匪之結黨爲害其弊實由於官之不能緝捕而民始無所恃民無所恃則窮者羣欣其利以顧目前而稍有身家之人亦懼匪之害已而官不能治也於是不能不藉匪以自護而匪之蹤迹愈密故多有搶劫迭出而究不知匪之所之者計惟力辦保甲始克挽此澆風臣刻已與司道督同首府縣力爲稽查議定章程由省垣以至外屬均飭一律舉行使民戶先無從隱飾奸宄自不能窩藏又復申諭各糧戶革故洗新遇有劫盜會匪幫同各州縣圍拏以期有犯必獲一月以來各屬聯合團甲緝獲巨匪數十名皆搶劫拒傷之犯臣於訊明後照章

辦理民氣似覺一振由此循而行之盜風或可稍戢耳若夫綠營之弊積玩既深計惟有申明紀律勤加訓練臣現令臣標中軍副將琦明會同各標將弁於省城十營定立課程逐日兩操並飭於五日內將弁兵中箭中槍各數開摺呈報一次使其各操功課自無暇再事嬉遊至於茶坊煙館則令成都華陽兩縣勤加巡查如有弁兵三五成羣聚會其中立拏重懲並咨會將軍及提臣一律嚴查辦理其外營則咨行各鎮將令照省標一體操演並不時派人密查以期核實擬從此大加振作一二年後營務或可改觀至留防各勇營漫無統制萬難得力而川中又多係楚勇口分過優饒需恐難爲繼臣初意本擬略爲裁撤因思

川省邊防逼近夷巢至爲遼闊卽界連黔滇之區伏莽亦復不靖而內地近日私梟會匪所在多有未便卽爲裁撤致疏防範惟查楚勇口分過大此時若不酌減則糜餽滋多若卽行議減則用其力而減其饗彼必有所不願既不願而必強爲我用難矣臣今擬爲彼撤此募之法使其辭舊營而歸新營則勇丁既可淘汰口糧亦可改減於餽需勇營兩有裨益現已將裕字兩營律武三營楚勇遣撤一面另派得力將弁隔別招募成軍其口糧卽照山東勇糧章程支發刻計楚勇一營改爲新勇一營月可省銀八百餘兩勇亦別無他議實亦節流之一助也至於各廳邊防現惟馬邊一處有勦辦之事臣近派候補道周振瓊帶靖

武兩營前往督辦連日接據稟報已將各夷所踞隘口焚
奪出巢之夷漸次埽除可期迅速歲事其餘各邊亦已專
飭該文武等妥爲安撫平時務將各營認真訓練以資鎮
懾並嚴禁弁兵差役滋擾該夷其有年終應給賞需亦令
照賞不得私行扣剋而於土司人等待之以禮示之以恩
使其樂爲我用然後可責以駕馭之事如有頑梗之夷出
巢滋擾者卽爲實力勦捕毋得遷延貽誤查該夷獷而不
狡但能示以恩信而又懾以兵威自可帖然無事惟川省
邊地自昔爲要臣擬俟省署公事清理就緒當於八九月
內親赴各邊審察夷情並將沿邊地利形勢逐一查看設
法妥辦以冀久安凡此情形皆臣現時整頓之大略惟爲

治務清其源而去弊先其太甚川省敗壞之根其始由於
怙侈而其弊遂極於貪婪其病在於營私而其毒遂流於
百姓今欲黜華而去貪非刻已勵行不足以資表率蓋法
行自上理勢必然臣現已與兩司鹽道各將本署從前一
切應酬規費悉數革除不留餘隙而又將各項差使浮費
爲之極力刪汰使各屬無可藉口然後責之以謹慎辦公
廉潔愛民期在令出惟行庶積久乃有起色惟事處極微
非精心果力不能著有成效臣愚昧之質膺茲繁難深虞
隕越亦惟有竭智殫心與各司道力求實際不敢一事粉
飾稍冀力挽頽風用以仰答

聖主委任之至意所有瀝陳川省敗壞情形與現在籌辦

一應事宜謹恭摺具奏伏乞

皇太后

皇上聖鑒訓示謹

奏

曾璧光建祠

宣付史館摺

光緒三年六月二十九日

奏爲原任貴州撫

臣

平定黔疆功德在民懇

恩准於貴州及原籍捐建專祠並將勳績

宣付史館以垂久遠恭摺仰祈

聖鑒事竊維有功必錄

朝廷所以勵忠蓋之臣而歷久不忘士民用求永馨香之

報查原任貴州撫

臣

曾璧光品行端方學養深邃由翰林

院編修蒙

文宗顯皇帝恩遇

命在上書房行走出守鎮遠洊升道員遞權兩司同治六

年

賞給二品頂戴署理貴州巡撫收復各城軍務肅清

賞加太子少保銜頭品頂戴雲騎尉世職光緒元年八月

因病出缺

晉贈太子太保照總督例議卹

予諡文誠子孫並

賞官職科名凡

天語之褒獎極人臣之哀榮其治績見諸奏牘

諭旨者本無待

臣

瀆述願

臣

籍隸黔省前此蒙

恩賞假回籍修墓經行上下兩游目覩耳聞該故撫

臣功

德實有昭然共見者故敬爲

皇上纓陳以備史館采擇初該撫之受

命撫黔也僅安順遵義等郡邑數處尙未失守苗教回夷
賊蹤蹂躪殆徧外援旣絕文報鮮通將殍軍飢阤危萬狀
鄰疆皆保境自守無一粒一鎡之助該撫籲懇

恩施飭部撥餼飛函各省懇求援濟開誠布公抑然自下
川楚始漸出師軍民感泣效命卽以是年冬擊散烏江竄
匪屯營札佐息烽一帶聲勢聯絡餼道始通七年春開州
鼎照山賊首投誠江內漸次肅清遂渡江勦洗米坪金山
廬山賊巢軍威大振各逆悔罪來降者百有餘寨隨克龍
里亟東下取貴定省垣心腹之患除上下之援通旣而平
越清黃相繼收復節節埽蕩所向披靡羣苗望風瓦解下
游以次廓清惟上游回匪與滇省潛通勾結苗夷醜類實

繁根深蒂固又恃安南盤江鐵索橋之險抗拒官軍該撫計誅不法武員林自清等各營悚懼乃指授方略激勵文武戮力同心奪橋直前賊棄關東潰遂克安南回酋喪魄貞豐及興義府縣等城迎刃以解各賊盡聚新城皆百戰死黨據險立礮驍悍異常諸軍乘勝徑進首夥全就掩擒其餘郡縣股匪莫不埽穴犁庭全黔底定黔地跬步皆山素稱天險雍正年間苗變用兵至數十萬降而復叛者三前後征勦十餘年方獲平定該撫受事於全省糜爛糧餉兩絀之時總計內外兵數無幾平日求一飽不能戰勝無數金之賞卒能戡定禍亂轉危爲安是蓋仰荷

穆宗毅皇帝特達之知感激圖報旣不忍因循玩愒尤不

敢粉飾鋪張事棘則以一身力肩危難功成則歸美於鄰
疆僚屬終日兢兢無矜伐之色與人言善氣迎人曲盡事
理雖驕兵悍將厯任所不能馴者該撫片語拊循無不忍
飢茹苦悉聽驅策從未聞以糧匱饑缺見諱者是以內外
協和爰有成績厥後繕城垣集流散編保甲給牛粒百廢
具修方虞伏莽未淨留勇分置要害以遏亂萌復念苗夷
梗化皆由文字罕通嘲哂鄙野設義學於各苗寨令子弟
讀書習漢語以變其俗而喻其心並於省垣添設經古書
院親賢勸學教讓興廉捐穀數千石存糧儲道署以備凶
荒生平廉靜寡欲自諸生以至封圻服食起居不改寒素
故能耐苦任勞宏濟艱鉅當軍務倥傯每夜坐達旦退食

餘閒惟手一編身故之日僚屬入視僅敝衣數篋支給存俸始獲成殮川省援黔之役月糜金錢十餘萬欲罷不能賴該撫速平黔患川力以紓桑梓尤爲感戴凡茲豐功厚德兩地交推可否仰懇

天恩准於貴州四川各建專祠由地方官春秋致祭並將
臣臚陳政績

宣付史館俾隆報饗而免湮沒之處出自

適格鴻慈所有擬請原任撫臣建祠入史緣由謹繕摺恭陳伏乞

皇太后

皇上聖鑒訓示謹

奏

收復馬邊核桃汛地摺

光緒三年七月二十二日

奏爲馬邊夷匪負隅抗拒經官軍疊次進剿收復核桃汛地辦理尙爲得手謹恭摺馳陳仰祈

聖鑒事竊臣等於光緒三年四月二十九日將馬邊夷務情形暨委員接署文武各缺緣由附片具奏六月十八日差弁齎回原片內開軍機大臣奉

旨知道了欽此謹卽轉行該廳營暨各營將領一體欽遵去後伏查馬邊夷地縱橫千數百餘里地勢險遠其間種類繁多漫無統率前據各營報稱左右營夷匪雖已回巢仍復狡詐遷延意存觀望自非旰以軍威難期懾服且查從前建置左右兩營相距一百二十里各距廳城亦一百

二十里又於距城六十里當衝隘口安設核桃汛居中控制互爲犄角規畫極爲周詳自咸豐四年該汛失陷未經收復不惟左右兩營隔絕不通廳營亦四面受敵遂致夷燄日張臣此次詳稽圖志默審戎機以核桃汛爲夷匪所必爭非收復該汛不能扼其吭非分道合攻不能搗其穴當於各將領稟內明晰批示嚴飭穩慎進取旋據統帶靖武營候補道周振瓊稟稱到防後悉心籌議知左營一路夷匪最強欲進攻核桃汛必先據火石墩而後節節疏通可期得手隨率所部左營同管帶武字副前營提督胡國珍扼紮大有汛其右營一路派所部右營及管帶達字新前營總兵黃三秀分紮大鴉口天保寨等處派鄉導營參

將陶春廷及廳勇百名紮煙峯汛走馬坪兼防運糧要路
五月初九日周振瓊胡國珍由大有汛分隊從溜沙坡萊
子壩兩路進發卽有夷匪千餘嘯聚林巔木石雨下各勇
丁奮力爭先連環策應轟斃夷匪多名立將火石墩奪獲
周振瓊當與胡國珍暫住花椒坪遙望核桃汛緊接來斯
岡危峯對峙奇險異常中隔一溝曲折蜿蜒兩岸蠻房如
櫛周振瓊分道以火攻取勝隨於二十七日各派七成隊
令提督張錫卿守磨子坪令遊擊陳樹勳領隊跨山而下
胡國珍率總兵唐珊峯沿南岸而進副將羅志珂及廳勇
軍功呂承先繞北岸而進行抵雙河場卽拋擲火蛋火箭
將兩岸夷巢焚燬風高火燥煙霧迷漫該夷抱頭狂竄時

陳樹勳轉戰而前另有夷股盤踞來斯岡滾放木石各勇冒石前進槍礮橫施逆勢不支紛紛敗竄我軍遂會合追殺當將核桃汛收復翼日仍派陳樹勳羅志珂等由梯子巖至二十里外之沙匡唐珊峯等至十里外之中背溝埽盪而前計兩日平燬夷房數百座斬馘一百餘名奪獲糧食牲畜刀矛多件前後陣亡花翎參將張連芳都司蕭俊湖守備王泰益及勇丁十五名受傷六十餘名此左路由火石墩規復核桃汛之實在情形也至右營一路則以黑泥溝天星橋爲最險其著名夷匪則小木干水陸根兒六鐵等支而夷酋那六二娃尤稱獷悍五月二十二二十三等日黃三秀探知大鴉口外乾河溝廣聚夷匪數百隨帶

勇跟追敗之於現牛坪芭蕉壩等處旋聞黑泥溝老巢防範不密六月初七日約會靖武右營各派勇五成渡河進勦令哨弁章世榮選勁勇四十名埋伏黑泥溝山徑而自率百長滕紹揚等行抵天星橋該夷傾巢出戰我軍刀矛並舉槍礮齊施轟斃二十餘名生擒二名更有夷酋指揮逆眾拚命抵敵章世榮從後山攀緣直上前後來攻槍斃夷酋割取首級各逆始紛紛奔潰章世榮往來衝突又陣斬五名轟斃十餘名立將兩處夷堡百餘座焚燬殆盡卽有呀納巴射兩支詣營乞撫救出難民十八名奪獲弓弩蠻刀氍衫百餘件陣亡勇丁七名受傷三十二名查驗首級卽屢抗官兵之那六二娃而參將陶春廷及靖武右營

十一日又於魚濠口橫山壩獲勝此右路疊次獲勝陣斬夷酋之實在情形也周振瓊等既復核桃汛於六月初七初八等日分隊按山敗賊於薺摩坡申薺河十六日又傳令各帶五日行糧由核桃汛進勦花板岡以達三河口三河口者卽馬邊左營城署也維時兵分三路以陳樹勳合所部右營出溜沙坡爲一隊呂承先率廳勇及所部左營出核桃汛爲一隊胡國珍令唐珊峯等出磨子坪爲一隊沿途夷卡林立我軍買勇前驅敗其守卡之夷將左手沙壩子右手新場野豬池堅巢焚燬向三河口進攻勇目安添壽手刃執旗夷目陳樹勳唐珊峯等分投痛勦各有斬獲遂整隊由雙土地直抵三河口營城與左營會合計燬

夷巢千餘座焚其牲畜糧食器具甚多斬馘數十名奪獲
擡槍氈衫蠻矛弓箭皮袋二百餘件陣亡勇丁七名等情
先後具報前來臣等查核桃汛自咸豐四年被夷占據於
今二十餘年該夷恃險猖獗附近村舍爲墟今幸仰仗
天威恢復舊制各將士歷險入深疏通大路洵爲出力臣
伏查夷人本多强悍而自核桃汛以外山深箐密該夷於
我軍出隊時往往潛伏不動及至兵勇收隊則四面圍集
截我後路稍疏防備卽爲所乘是以我兵受傷亦多地勢
使然臣恐路險兵單現又派統帶達子營總兵張祖雲率
該部右營及親兵二百名統帶親兵營副將李忠楷率親
兵二百名馳往左右路隨機助勦並以沙匡一帶悍夷現

廣聚其中必須大加懲創庶足以收全功當經授以機宜
嚴飭各將領乘此聲威認真勦辦一面令已降夷衆招撫
被逼及素來安靜夷支並多張示諭解散脅從務使該夷
畏威悔罪歸誠乃可審度情形妥籌善後以期仰副
聖主綏靖邊隅之至意所有官軍攻勦馬邊夷匪收復核
桃汛辦理尙爲得手情形謹合詞由驛馳奏伏乞

皇太后

皇上聖鑒謹

奏

籌辦黔岸鹽務官運商銷摺

光緒三年七月二十二

奏爲黔滇兩邊鹽務廢弛已久現擬委員先行籌辦黔岸請將新舊引鹽改由官運商銷酌擬章程敬繕清單並請借撥各款恭摺仰祈

聖鑒事竊照川省財賦除丁糧外惟以鹽務爲大宗從前地方無事滇黔兩省多銷川鹽就黔省而論如黔西大定遵義仁懷等府廳川商設號行鹽由永甯綦江等處轉運每年銷引數萬張上裕庫款下便民食地方亦覺安靜自軍興以來黔地處處被擾人民離散死亡十不存一商人歇業引滯岸懸直同廢棄而川省之利盡失所賴濟楚一舉稍資安集近年兩淮議請規復淮綱屢准部咨令設法

籌辦停止濟楚雖審時度勢未能遽行然亦終非長策而
綜查邊計各引積滯八萬數千張積欠羨截一百數十萬
餘兩雖日事追呼而引既未行從何籌補臣到川以後觀
商力之困竭念邊岸之廢弛又見川省私販日充地方時
虞不靖竊擬設法整頓因思滇黔兩邊同行川鹽均應舉
辦然當此課款支絀成本難籌若滇黔同時並舉力量萬
有不逮現今先於黔邊試辦官運設局分銷俟有規模鹽
本可敷騰挪再籌滇岸期復舊制惟事屬創始措手殊難
非清正強毅精明練達之才不足以資委任茲查有四川
候補道唐炯籍隸貴州於川黔兩省邊勢民情洞澈無遺
而才氣亦足以濟事當飭該道會同藩司程豫鹽茶道蔡

逢年悉心籌議去後茲據該司道等詳稱軍興以後川省邊鹽引岸曠廢已二十餘年現議規復實同創始就黔岸而論從前川鹽行黔由永甯縣前進者爲永岸由合江縣前進者爲仁岸由涪州前進者爲涪岸由綦江縣前進者爲綦岸四岸行商各十餘家悉是陝西大賈資本甚鉅迨值黔亂相率歇業秦中又遭回患家產蕩然不能重整口岸近年每岸雖有數家多屬川黔之人湊資朋充本非殷實稱貸不易加以水陸險遠輸運艱難此其不能暢行者一邊商行引除本省釐課外商人領引有費引底有息開籤驗截有規踵事遞增任意需索一入黔境經過處所釐卡林立如布網羅而黔岸通歲所收釐金並花布木植大

宗不逾十萬無補公家加以關稅之重征官吏之苛派土豪地棍之把持需索商本動致虧折往往視爲畏途此其不能暢行者又一近邊計岸壤地犬牙計商鹽本較輕輒以計鹽侵灌黔界邊販遂就輕避重貪買計鹽邊商亦停擱正引重照影射加以船戶盜賣糝雜泥沙誑報漂溺串同爲奸如合江之雷都磧江津之白沙毗連南川之木洞彭水之郁山鎮向爲私販捷徑盤踞透漏他若黔之興義耶岱獨山一帶近滇者有滇鹽攬越近粵者有粵鹽攬越此其不能暢行者又一今欲重整黔岸商力旣窮非設局試辦官運不可爲力欲辦官運非埽除從前積弊亦不能見效該司道等博訪周諮酌議章程十五條呈請察核具

奏前來臣詳加披閱大要以局運商銷力裁浮費疏通引岸禁止需索爲扼要之圖且清釐積引以杜重照之萌兼辦計岸以遏影射之漸裁局卡立船行以暢運銷之路嚴交盤慎出納以絕侵欺之源而又酌核帶銷以清積滯分認奏銷以專責成所議極爲周密果能認真舉行則黔岸自可漸復邊引不致積欠裕課便民無善於此自應查照試行臣現擬於瀘州設立辦理黔邊鹽務總局委唐炯前往駐劄督辦官運商銷黔鹽事宜並刊發木質關防以昭信守所有永綦合涪江南六岸及本行邊引之酉秀黔彭納谿暨近邊州縣計引悉提歸總局轉發配運以一事權並於產鹽之富順犍爲兩廠每廠設立購鹽分局綦江涪

州合江永甯江津南川六岸每岸設立售鹽分局凡給票
配行收鹽發商驗票緝私等事各委幹員分司其事並將
局辦各岸奏銷由局自行專辦俾專責成其從前各州縣
積欠改歸局辦各邊計之引張及羨截稅課各銀兩均應
隨時會商司道核辦由臣飭鹽道詳細查明引數銀數分
年分成帶還以示清晰其一切應辦事宜統由唐炯調度
惟此次由川辦理官運係爲疏通黔岸而設所有川省州
縣關卡一切漏規浮費已詳細裁革而黔中自兵燹之後
因饟項支絀不得已抽收鹽釐商人運鹽到岸見十抽一
謂之大釐聞未能悉數歸公且沿途復有半釐小釐落地
稅各名色又有查局分局驗票局及各州縣私設卡局層

層派索每引一張運入黔境實抽釐銀不下數十兩以致
商販裹足綜計黔省鹽貨各釐歲入不過十萬鹽釐僅居
一半所得甚微而於川鹽銷路大有阻礙茲擬由川每年
暫行認解黔釐銀五六萬兩分夏冬兩季撥解以濟饒源
以後如銷路日暢鹽務大有起色再行酌量多撥以昭核
實如此辦理則黔饒可歸實濟而川引亦可漸復相應請
旨敕下貴州撫臣通飭局卡凡遇行黔鹽釐一體免收其
報部關稅悉照部則上納不許重征並嚴禁各地方官設
局私派以通商路乃爲有濟且以目下形勢而論川省戶
稠人衆黔省土曠人稀但使邊鹽暢行商人趨利若鶩五
六年間黔中人民逐漸復業口岸亦逐處興復其工作力

役藉沿途店棧爲生活者通計四岸引地不下數十萬人而移家就食置買田地招徠開墾相因而至殘破之區或可藉此轉爲富庶雖一時未必大效而異時固可操券實於黔省大有裨益至現在川中邊引積至八萬七千有奇未完羨截一百三十六萬六千餘兩計引積至四十六萬一千有奇未完稅羨四十七萬九千餘兩現在邊岸甫經創辦其濟楚銷路臣體察情形其勢實未可遽停免致積欠終懸且恐別滋意外之事請俟川中積引銷竣後再行查核奏明辦理至此次籌辦黔岸並辦計岸引地寥闊銷路紛煩必須多運鹽觔存儲總局方資轉運而自領引以至廠竈買鹽水陸轉運各費並各總局分局製備一切家

具等項成本甚重從前黔岸暢行時西商各處設立行號
運銷資本合計不下千萬始敷周轉今官爲辦運是以一
局而應無數之商販勢不能不厚集資本計非湊銀五十
萬兩不足以資周轉惟此時川省庫項一空各處借撥之
款尙屬籌措爲艱豈能湊此鉅款而川黔大局所關亦萬
不能視爲緩圖自須另行籌措查臣前撫東時於糧運兩
庫百計撙節尙有餘款可以挪借茲再四思維擬請借撥
糧道庫銀十五萬兩運庫銀十五萬兩臣再商之湖北督
撫臣由該省釐稅項下借撥銀十萬兩共銀四十萬兩其
餘十萬兩臣擬就本省各處湊借以足五十萬之數至借
撥之款分作八年陸續歸還如此一爲轉移在東鄂不過

奏稿卷一三
三
暫時通挪銀兩不致無著而川省得此接濟將黔岸興復則可爲川省圖久遠之安亦可爲

國家興百年之利至臣於庫款向屬謹慎事求核實不敢分毫虛糜此次借款如果歸還一無把握斷不敢以庫儲有用之財輕爲嘗試亦不敢以本省應辦之事貽累鄰疆相應請

旨飭下湖北山東各督撫臣籌撥解川用資措辦想各督撫臣關懷大局夙著公忠必能竭力通融借撥共助扶持所有先行籌辦黔邊鹽務改由官運商銷酌擬章程並請借撥各款緣由除咨部外理合恭摺附驛具奏敬繕清單
恭呈

御覽伏乞

皇太后

皇上聖鑒再川省鹽課奏銷定例於四月內由鹽道查明截數於五月內詳明具題經徵不力州縣均有處分此次將引提局創辦官運一切規模非數月後不能定局計距來年四月不過半年期限促迫黔中道路險遠商人趕銷不及勢難於半年之內清一年之課所有本年丁丑行黔邊引及改歸邊岸計引新舊課稅奏銷並請

敕部展限至光緒己卯年五月辦理以後即可按年趕辦以重考核其有一切未盡事宜應由臣督飭蔡逢年唐炯隨時籌畫總期於鹽務有裨合併陳明謹

奏

謹將議定鹽務章程十五條繕具清單恭呈

御覽

一裁減浮費也查從前商運每邊引一張由縣領引各關投文開籤截驗以及落地稅食鹽漱口鹽種種規費共約需銀二十餘兩忝意剝削踵事遞增迨入黔境層層局卡如布網羅每引一張共約需銀五十餘兩而地方官之需索苛派不與焉加以本省課羨釐金廠價運腳每引一張共需銀二百七八十兩不等成本既重利息甚微商人畏累裹足不前卽現在一岸行商不過數家朋充承認大都資本不厚勢不能不夾帶影射挪東補西私販因之日熾額引愈形積滯是欲疏引必先恤商此後邊計除濟楚仍

舊外所有四岸引張無論邊計新舊應由局配運無須使費其四望關健爲關江安關鄧井關瀘州關涪州合江納谿重慶府經歷開籤截驗等費若全行裁革無以辦公應酌定每引一錢五分通飭各關縣一體遵照以歸畫一年終由各關縣備文赴總局請領不准地方衙門書巡人等再有索取食鹽漱口鹽等名目至敘永向抽落地鹽稅並非正款應永遠裁革至於黔省除百貨釐金外凡川鹽入黔應請

敕下貴州巡撫通飭局卡遇有鹽觔經過不得留難抽釐其報部之關仍照則上納不准重徵商人開設子店地方官不准需索苛派並不准私設局卡抽收庶成木少輕銷

路日開矣

一清釐積引也查犍富榮三縣積滯邊引自道光二十八年咸豐六七年起截至光緒二年年底止除認代潼引一萬六千八百三十張存鹽茶道庫未經發領外實積黔邊水引七萬零七百零三張節次展限猶積欠自咸豐三年起並本年未完羨似總共銀一百三十六萬六千有零推求其故一則處分綦嚴有官求倖免而自賠課者有挪羨釐墊課苟且目前者而積滯在官一則商力疲乏無人承認有由坐商賤賣以納課者有行商並完羨截坐商侵挪虧欠者而積滯在商而口岸之廢弛銷路之阻塞不與焉若不澈底清釐將移新補舊舊者未清新者又積挪彼填

此此款未實彼款已虛是不但畫餅不可以充飢竊恐輾轉膠轕愈積愈深徒以飽官吏之欺侵縱奸商之影射而鹽法且蹶而不復起也應飭各該縣勒限將已銷未銷在官在商逐年分晰據實造具清冊並引申送總局查辦分別追賠停緩另行專案奏咨此後引張由局配運以斷膠轕而免牽掣

一酌核帶銷也查犍富榮三縣每年額行黔邊引一萬零七百七十六張自道光三十年清釐鹽務犍富兩縣共認代潼引二千五百二十二張咸豐五年以後黔省糜爛銷路阻塞遂將邊引改配濟楚以救課稅截至光緒二年年底止邊引既積七萬有零而潼引一萬六千八百有零猶

存道庫若復仍前套搭無從劃清界限又舊引積滯已多
新引例須請領若再推展敷衍徒留虛名羨仍無著且庫
款又復糾纏必至仍前挪掩應請於總局開運之日起先
行新引歷年積引以次帶銷若果黔省照議不再抽釐不
准地方官私設局卡需索苛派行銷必至倍加是每年額
銷外積引必能帶銷六分以後可冀年清年款至於積滯
潼引應全配濟楚庶不占礙新引地步而界限劃清辦理
亦少轆轤矣

一局運商銷也查四岸行商有井有竈者不過數家餘皆
朋充資本不厚無力者既難周轉有力者又多影射額引
積滯此其一端行商自岸入黔節節開設子店每店動需

一二萬金沿途以鹽盤鹽到店則散發小販赴鄉零售按
關收帳今若官運官銷費用過鉅稽查難周在販有脫空
之虞在局有欺侵之弊若官商並運在途則多夾帶影射
在岸則虞壟斷把持惟有局運商銷以簡御繁諸弊可期
斷絕且行商藉資周轉獲利既多人情趨利若鶩承銷必
衆是亦招商之一法應於瀘州設立總局敘永合江綦江
涪州兩井兩廠各設分局給票配引買鹽分運歸井廠分
局管理收儲鹽觔發商行銷驗票緝私歸四岸分局管理
各專責成庶免貽誤至於先繳後銷抑或先銷後繳甫經
創辦礙難懸定應俟一二年再行奏咨立案

一兼辦計岸也查邊引行黔向分四岸由涪州綦江合江

敘永進運接壤地面犬牙相錯每多攙越從前計商力乏多係邊商代行以邊保計自黔省肅清銷路漸開計商又串買他岸計引以計充邊以致連年訐訟而合江之雷都磧江津之白沙毗連南川之木洞彭水之郁山鎮向爲私販盤踞馬頭又復透漏充塞大定遵義仁懷正安松桃一帶邊引所以愈形積滯應將涪綦合敘瀘州江津南川及本行邊引之酉秀黔彭納溪近邊州縣計岸全歸官運辦理由局奏銷庶整齊畫一辦理裕如而訟爭永息積滯可疏矣

一引歸局配也查行黔邊引向由健富榮三縣於鹽道衙門請領回縣發商承銷例應一年一換隨時繳殘道光三

十年清釐鹽務奏銷報完後扣限一年全行催繳解部逾限卽爲廢紙並飭廠關各員查明扣留申繳立法本屬周密乃二十餘年來積滯引張竟至八萬七千有奇而官吏之賄縱商總之侵漁奸商之影射私販之透漏串成一局牢不可破是非法之敝人人實廢法久之遂敗壞不可收拾誠非區區拘牽文法所能轉機應將此後四岸邊計各引由鹽道移送總局庶事權畫一以便隨時隨事相度辦理無誤奏銷

一展限奏銷也查川省鹽引課稅奏銷定例於四月由鹽道截數彙詳請題經徵不力之州縣欠完至二三分以上者例議褫嚴此次開辦官運係屬創始一切規模非三數

月不能定距來年四月不過半年期限促迫而大江旣虞漂溺小河又苦牽挽及入黔境道路險遠必待栽種旣畢人夫始多節節轉運甚屬艱難不獨各岸一時不能驟銷卽各岸捆運亦一時不能齊全實不能於半年之內清一年之課額勢必捏報全收若照已收實在之課羨截數造報難免開商人逋欠之門啟委員挪移之弊請將本年丁丑行黔邊引及改歸邊岸之計引由局奏銷展至己卯五月以後仍扣滿一年造冊奏報

敕部定章所有富順犍爲榮縣及近邊之瀘州納谿敘永合江綦江涪州本行邊引之酉陽秀山黔江彭水各該州縣處分一律並展又前欠稅羨由局分年帶徵完繳籌銷

局員並請免照接徵接催之例開送職名以免牽顧而歸
畫一

一嚴定交盤也查川省各釐局向係儘徵儘解每遇交替
局中文卷自行攜去往往虧挪漫無稽考此次創辦官運
事體重大款目繁多應照藩司鹽道盤查之例所有總局
正雜收支數目分年分款開列四柱彙造月報每年奏銷
及遇交代之時詳委藩司監察虧則題參足則出結題報
如有扶同隱匿等弊一經發覺照例參處至各局委員離
局之日照州縣交代例一體造冊加結呈詳總局移報藩
司查核若有侵挪虧空情弊卽行嚴參究追
一慎重出納也查鹽課羨截向由各州縣批解鹽釐由各

局批解均歸鹽道衙門挂發此次辦理官運成本不厚若
循向章配引若干卽截繳課釐若干批解必致不敷周轉
有礙銷運且旣由局奏銷嚴定交盤所有款項應留總局
分別正雜聽候撥解毋庸更解鹽道徒煩案牘其平餘一
項應立專款聽候提撥本省公用至每月銷鹽若干收價
若干各岸分局按旬申報總局總局按月彙詳總督衙門
並移藩司庶昭慎重而杜侵挪

一認解黔釐也黔省自兵燹之後餽項支絀不得已抽收
鹽釐商運到岸以見十抽一謂之大釐沿途復有半釐小
釐毫金落地稅種種名色又有查局分局驗票局及地方
州縣私設卡局需索苛派層層剝削每引一張運入黔境

實抽銀五十餘兩以致商販裹足銷路阻塞而黔省釐金並花布木植大宗雜貨每年通計未逾十萬是鹽觔一項不過得半之數今既請

敕下貴州撫

臣

錫免鹽釐嚴禁地方州縣私卡苛派自應

由川認解黔釐以歸實濟擬每年認解黔釐五六萬兩勻攤於四岸鹽本內徵收按冬夏二季撥解目前爲數雖覺減少但使銷路無阻蜀饒充裕黔之協饒不致停久舍此取彼所獲已多而於兩省大計裨益實非淺鮮

一實給船價也查商號運鹽均交船戶並許帶私藉減船價其船隻又係商號借本製造船戶亦意圖夾帶甘心忍受每載竟有夾帶數千觔萬餘觔者沿江售賣遂致私販

日熾應將船價照民間河規平市實發並明定章程設立船行招集船戶編列字號連環取保刊刻大票每船載鹽若干張計若干觔價值數目船保姓名由駐廠分局委員於發運時填給船戶收執到岸隨鹽呈繳分局查報總局其沿江關卡照章點驗不准夾私盜賣並示禁沿江居民不准接買查出嚴行懲辦並將該保戶一同治罪

一刪減引底也商運行鹽必先向坐商租引然後赴井廠配鹽每引一張約十餘兩二十餘兩不等由商總租收作爲課稅羨截領繳引費及地方官吏委員提課規費商局公費下餘之數不過二兩由商總分交各坐商謂之引底近來四岸悉係行商承運足知行鹽原不須用坐商歷年

羨截行商已繳全是商總侵挪乃商總藉茲引底輾轉私售如操市券先正課而坐享厚利緣積滯而陰售奸私以致行商成本加重昂價病民私販因之滋蔓難圖阻塞銷路本應全行裁革惟念邊商受

國家豢養已久此亦其子孫世業姑准留此引底以示格外體恤今引歸局配裁減浮費應繳課釐羨截均由總局分款彙解每引止酌存引底銀一兩由成本內撥收年終集有成數發交商總按名給領以歸核實

一添置聯票也鹽歸四岸分銷日久易滋弊竇應由總局刊刻雙聯票根票紙編列字號蓋用總局關防發存分局商人到局承銷鹽觔自一包以至數十包數百包於中縫

正字大書包數觔數價值多寡加蓋分局關防票紙截給商人別於前途扼要之地設一分卡委員點驗後收回票紙半月彙繳總局一次卽由分卡按包換給小護票以便商人售銷按季由商人彙繳總局票根照填簿冊存局仍由分局按月彙繳總局以憑核對庶行銷數日時價漲落俱可按冊而稽無從欺侵影射

一酌留津貼也查額定每引配鹽五十包每包重一百三十五觔惟鹽質甚嫩消耗尤多加以沿途盤運解捆掣驗拋灑消耗更鉅是以商人赴廠捆運每包加至二三百觔不等道光三十年清釐鹽務奏定每包連皮索准共重一百六十觔今由官運無虞夾帶而鹽之消耗與商運無殊

應准照成案每包以一百五十觔爲正額外加十觔以備
消耗飭四岸分局於銷售時多出餘鹽若干逐包記簿按
旬呈報總局另立專款以作支銷各局費等用仍由總局
按月詳報總督衙門並移藩司鹽道以資貼補而昭核實
一酌給獎敘也此次辦理邊岸鹽務係屬創始事極繁難
非羣策羣力不能有濟而鼓舞造就尤在信賞必罰此後
承辦人員如有侵挪怠玩情弊自應分別參撤停委其辦
理一年著有成效卽應量給外獎如辦理二年成效大著
應准奏請獎勵庶足以昭勸懲而策成功

津貼臬司兩首縣公費片

光緒三年七月二十九日

再四川刑名之繁甲於直省而臬司一缺其一切辦公僅例定養廉四千兩此外別無津貼缺分已極清苦又加以扣成減平搭票及難扣本省各項經費外每年所領不過三四百兩尤爲艱窘從前均係收受規禮以濟公用本非正辦臣到川後期與司道共飭廉隅用資表率而該司方濬頤特勵清操力崇節儉將該署一切規費悉爲刪除臣查其署中辦公各項竭蹶異常恐難持久當與藩司鹽道會商擬於本省籌備辦公經費項下酌量勻出一二成稍資接濟俾該司不致枵腹從公卽應辦公事亦可無虞掣肘又成都華陽兩縣爲附省首邑事務衝繁冠於通省一

切應辦公事比之外州縣繁難不啻十倍而辦公之拮据
殆有過之從前多借錢糧浮派藉以敷衍而向來爲首縣
者歷任一年半年卽行調劑以致通省州縣領袖之官竟
同傳舍未遑振作吏治之壞亦在於此臣到任後力除一
切浮費詳查該縣辦公情形實多賠累亦屬難於支持臣
現與司道公同酌擬於本省籌備辦公經費項下稍加幫
貼俾不致十分賠墊庶可責其盡心地方如才具優長者
並可稍令久任實於倡率吏治大有裨益謹附片具陳伏
乞

聖鑒謹

奏

查辦東鄉縣案摺

光緒三年九月初六日

奏爲遵

旨查辦東鄉縣匪徒袁廷蛟聚眾滋事帶兵官有無縱勇
妄殺姦擄各情業經委查確實並參核全卷暨現訊各供
分別定擬恭摺仰祈

聖鑒事竊

臣

於光緒二年十二月初一日准兵部咨到光

緒二年十一月初十日內閣奉

上諭文格奏續查營勇滋事情形據實檢舉自請議處一
摺據稱提督李有恆所帶虎威營勇丁前在東鄉縣有砍
傷趙姓八九人及抱去龐姓幼孩之事尖峯寨一帶房屋
燒燬多間是否該營勇丁所爲傳說不一李有恆與分帶

該營提督劉道宗在途中帶有婦女詢係該提督眷口其
來歷尙未查明殊難憑信等語帶兵官攜眷隨營已屬大
干軍律至營勇滋擾地方該提督等僅有縱容情事尤屬
罪無可逭東鄉縣袁廷蛟滋事一案前經降旨交李瀚章
訊辦李瀚章現調任湖廣總督著交四川總督丁寶楨確
切查明據實具奏勿稍瞻徇李有恆劉道宗著一併交丁
寶楨審明分別革職治罪以肅戎行等因欽此

臣接篆後

准前護督

臣

文格將原案卷宗咨送前來

臣

綜核全卷查

得光緒二年閏五月二十四日奉

上諭御史吳鎮奏四川匪徒滋事地方官辦理不善請飭
查辦一摺前據文格等先後奏報東鄉縣民袁廷蛟等以

請減錢糧爲詞聚眾滋事拒傷兵練疊經諭令該護督等認真辦理旋據陸續奏報拏獲要匪懲辦惟袁廷蛟尙未弋獲已諭令趕緊緝捕以淨根株今該御史奏稱袁廷蛟等聚眾滋事經知府易蔭芝等前往彈壓始而含糊繼以操切從事率行請勦帶兵之李有恆挾嫌縱勇搜殺無辜以致激成事端如果屬實亟應從嚴究辦以重民命而儆官邪著文格秉公確查知府易蔭芝及統領虎威寶營之李有恆有無辦理不善及前項情弊東鄉縣知縣及該縣局紳如應提省審訊並著查明究辦等因欽此又准刑部咨七月十六日內閣奉

上諭前據文格李瀚章先後奏報東鄉縣匪徒袁廷蛟在

逃未獲嗣據御史吳鎮奏知府易蔭芝辦理不善提督李有恆妄殺無辜當經諭令文格查明究辦茲據巡視北城御史奎光等奏袁廷蛟潛逃來京現經拏獲訊據供稱上年因該縣官紳苛斂難堪率眾赴局算帳該縣遂以民變稟請勦辦李有恆殺戮無辜擄掠婦女懇請代訴等情袁廷蛟著交刑部審訊暫行監禁其所供各節著李瀚章文格一併確切查明據實具奏不得稍涉回護等因欽此又於八月十七日奉

上諭袁廷蛟一犯現在刑部監禁著該部錄取供詞卽將該犯解回四川仍著李瀚章文格懷遵七月十六日諭旨秉公審訊以成信讞等因欽此又准都察院咨九月初五

日內閣奉

上諭刑部奏訊取四川匪犯袁廷蛟供詞鈔錄呈覽都察院奏中書蕭琮瑀等聯名呈控帶兵官冤殺姦擄請旨辦理御史李廷簫奏四川重案覆奏疑竇甚多請飭嚴訊各一摺四川匪犯袁廷蛟聚眾滋事一案雖該犯所供並無撲營抗拒官兵情事遽難憑信惟該紳士呈控李有恆於鄉民到營呈訴卽行斬殺所殺確係良民並無匪徒且李有恆印示有尖峯各寨搜殺無赦之語亦與原奏並無搜殺寨民語相矛盾並據該御史聲稱案情重大原奏疑竇甚多亟應從嚴覆訊以成信讞李瀚章甫經到任無所用其回護此案著仍交李瀚章將李有恆有無搜殺無辜情

事及袁廷蛟滋事各節秉公確查據實具奏袁廷蛟一犯
卽著刑部仍遵前旨解回該省並將原供一併交李瀚章
查辦等因欽此隨於二年十一月十八日准刑部將該犯
袁廷蛟咨交兵部並鈔錄該犯供詞一併解交到川各在
案查案內人證臣未到任之先早經護督臣文格委提到
省其本任東鄉縣知縣長廉與接署縣孫定揚亦早經撤
任在省候訊隨將李有恆劉道宗撤省並調案內應訊之
管帶裕字右營遊擊謝思友管帶律武中營總兵雷玉春
及降爲通判前任綏定府知府易蔭芝前署綏定府知府
王元晉前署東鄉縣知縣周瀚來省備質復經札委候補
知府熊紹璜知州李傳駿前往東鄉嚴密確查並以新授

殺定府知府志潤委署東鄉縣知縣梁融均係事後到任之員無所用其回護復經諄飭就近訪查實情稟復核辦去後隨據案內應訊文武各員陸續呈遞親供前來當督藩司程豫臬司方濬頤並委員等提集全案人證逐一研訊據職員王宗恩貢生向若璠龐大生從九品王宗堯暨民人吳芳體李開邦梁思明李金良李金都等各供詞被袁廷蛟藉糧糾眾勾合土匪吳奉山等燒燬房屋搶擄資財受害甚慘屬實李開邦並當堂呈出袁廷蛟夥黨簿據一本吳芳體並執有袁廷蛟書信先行呈繳在案又據貢生何景福龔少鶴廩生余正倫文生張仕達監生王成全李春芳等各供袁廷蛟藉算糧爲名糾眾圍城並將王成

全家燬搶屬實又據程文純供綏定營汛官楊開泰與世職蔡啟祥在廠溪會哨路遇袁廷蛟夥黨將軍火搶去隨經趙登科說還屬實又據監生陳憲高艾玉蘭等供袁廷蛟強約該監生等共帶七八百人各執器械到縣城外隔河駐紮要尋城內局士冉正江等算糧曾放槍礮助勢綏定府來縣委員勸散傳該監生到府算帳袁廷蛟不到二年正月袁廷蛟又到豐城場尋王宗恩等算帳該監生等並未同去屬實又據文生廖吉萬冉時帆覃仁仕等供該生等向在捐輸局經收銀兩均係繳官申解並無浮收情弊袁廷蛟因前次京控所欲未遂復藉算糧爲名糾衆滋事將該生冉時帆胞叔冉正江鹽店搶劫曾經報縣有案

是實又據袁廷蛟供光緒元年五月十八日小的邀同十二甲約有二三百人各執槍礮器械赴縣算糧本縣不肯開城小的就在城外隔河觀音巖住紮馬洪崙也帶一百餘人前來經綏定府親身到縣諭將錢糧照舊章征收曉諭解散小的們應允十二月十二日陳有貴鄭曉亭等同小的都到李金良家邀他去尋局士算帳李金良避匿小的同陳有貴們就在李金良家住紮十六日小的們散後有官渡場住的李開邦們叫人來請到官渡算帳小的同朱青山們帶有三十餘人前往住紮城外文武宮李開邦放火說小的搶場齊人來捉小的當就跑走把朱青山們殺傷九人赴縣具稟二十四日鄭曉亭們帶人到龐大生

家算帳小的也到正月初宋青山挾李開邦等殺傷的嫌查得那夜是太林孝花行出錢幫拏就帶領一百餘人同小的到官渡尋李開邦都已搬走衆人就在花行尋太林孝不依把花行門打毀又說太林孝藏在鹽店內衆又把鹽店門打毀並未搶劫十三日小的帶人到豐城場尋王宗恩算帳王宗恩已搬往寨上小的叫人去喚不來被族鄰將他房屋打毀李開邦們稟縣請兵勦辦二十六日管帶律武營雷玉春來紮蝦耙口打破小碕子把小的姪女殺死二十九日管帶虎威營勇劉道宗來紮官渡小的會見趙扶仁說營勇有下鄉估拏柴草姦淫婦女的話小的叫捉拏捆送初三日趙扶仁約團數百人各拏器械在官

渡後山梁上點名李開邦向虎威營說小的要撲營劉道宗就派勇出隊接仗把王盛祥捉去乘勢燒毀趙營房屋百餘間初五日打破尖峯寨殺燒千餘家聞人說李有恆勇丁擄去婦女二百餘名開船載去小的實未眼見亦指不出被擄婦女姓名住址等供又據署綏定府知府王元晉供卑府奉札飭赴東鄉籌辦事務並未令會同勦匪有札可查其先後奉查勇丁姦擄暨李有恆藉清查賺入寨內及縱勇報復並尖峯寨婦女先辱後殺擄掠數百而去查明實無其事均經據實稟覆在案是實又據署東鄉縣知縣周瀚供卑職奉札於光緒二年二月二十一日馳抵東鄉縣城其時民情驚惶紛紛逃難其構釁之由聞係因

糧而起當擬告示安撫曉諭三月初四日探得初三日袁廷蛟等在官渡豎旗放礮經劉道宗擊退卑職仍多方招撫各寨嗣負固者始相率投誠至四月間諸事漸定卑職始將錢糧照舊章減收具稟有案等供又據撤任東鄉縣知縣長廉供袁廷蛟因藉糧爲名煽惑鄉民聚衆來城算帳當稟本府親來辦理解散卑職十月間交卸後袁廷蛟又復滋事卑職早經調省至地丁津貼前在任二年均係舊章年年有減無增亦無聽局紳浮收情事有卷可查是實又據前任綏定府知府降調通判易蔭芝供光緒元年五月內袁廷蛟京控發回在鄉聚衆盤踞縣城南門外對河稱向紳士算帳經知縣長廉以人數衆多帶有槍礮旗

幟稟請卑府前往查辦袁廷蛟遣其黨呈請減免錢糧並與局士算帳卑府爲安民起見准子減收各局士等飭縣解府清算曾經通稟以人數太衆請從寬免究嗣局紳等赴府袁廷蛟屢限抗不赴質十二月十二日卽據該縣孫定揚稟報袁廷蛟勾結外匪將李金都等房屋打毀逼脅居民意圖滋事懇請勦辦隨會同綏定營委千總楊開泰世職蔡啟祥帶兵百名前往彈壓一面通稟嗣奉批已據孫定揚續稟檄派虎威各營分途進攻彼時又據該縣稟報汛弁許安國在官渡被圍逃回縣城危在旦夕等語又傳聞派去之楊開泰等被圍兵丁概無下落嗣許安國楊開泰逃回始知兵丁回縣軍裝器械無存隨即查明袁廷

蛟句來開縣匪徒將李金都房屋打毀又以年前孫定揚議派次年捐輸並不照定章反於四千二百文之外加派錢五百文仍照常設局辦理袁廷蛟以此煽惑鄉民聽其號召據蔡啟祥回稱該處民人均爲袁廷蛟所惑兵丁前進逢擁抗拒爲匪爲民不能分辨因此軍裝馬匹遺失嗣卑職卽行撤任軍營一切概未得知屬實又據調署東鄉縣知縣孫定揚供卑職於光緒元年十月十三日到東鄉縣署任已在袁廷蛟藉糧滋事糾衆圍城之後十二月訪聞袁廷蛟句開縣匪徒吳奉山等多人向紳糧生事卽移請汛弁許安國前往彈壓袁廷蛟在蝦耙口官渡場各處豎旗立營向各戶估索錢米將李金都等家房屋燒燬擄

掠資畜並將官渡團局軍火器械搶去迭據團甲程瑞亭等呈報稟明本府派綏定營兵百名交千總楊開泰世職蔡啟祥前來彈壓袁廷蛟復同吳奉山等在白馬廟搶劫花行鹽店並焚燒龐大生等房屋數十家銀米搶掠一空二年正月初三日袁廷蛟在官渡將許安國等圍住該弁乘空逃回楊開泰等至廠溪遇匪被圍兵丁受傷軍火器械盡被搶去卑職因匪勢日張始據情稟請撥勇勦辦至東鄉元年津貼捐輸已經本任長廉征收嗣於十月奉文派辦二年備捐銀五千兩因東鄉購銀不易擬於次年開征時銀錢聽從民便隨糧上納旋因袁廷蛟滋事尙未開征至袁廷蛟勾匪滋事未能先事防範咎有難辭等供又

提訊管帶裕字營遊擊謝思友供東鄉袁廷蛟滋事遊擊
於二年正月間奉派前往勦捕嗣於二月內卽奉調回省
以後軍營一切事故遊擊概不在場屬實又據管帶律武
中營總兵雷玉春供光緒二年正月十六日奉前任總督
吳棠飛札以東鄉奸民袁廷蛟糾衆滋事飭往會勦二月
初六日營抵東鄉探聞袁廷蛟在距東鄉城一百二十里
之峯塵場初六日行抵該處又聞在蝦耙口又據民人傳
說袁廷蛟匿遁白馬硎二月二十六日派勇捕獲袁廷蛟
之妻子並親黨十餘人三月初二日接李有恆王照南函
稱袁匪潛匿千金硎因出隊至硎拏獲匪黨數人所到之
處多係出示解散並未抄殺是實又據前管帶虎威營記

名提督劉道宗供光緒二年正月提督隨調赴東鄉縣屬官渡場住紮袁廷蛟三月初三日旬結馬洪崙等千餘人豎立大旗放礮鳴筒欲撲卑營經接仗擊退該匪羣據尖峯寨中初五日隨同李有恆督隊圍攻衆匪抵死抗拒互有傷亡鏖戰多時始將寨攻破其餘各寨洞投誠悉予安撫至所參卑營抱去龐姓幼孩之事提督查據後哨百長賀元林稟稱伊兄在四川渠縣貿易聞伊到東鄉來營看望回渠縣時有一貧婦抱一幼孩開明年庚情願出抱伊兄賀喜林遂與錢二千布一疋給與抱爲子嗣帶回渠縣是真提督將賀喜林及幼孩並提來營訊明不諱現在看管聽候發落是實又據統領虎威寶營記名提督李有恆

供東鄉匪徒袁廷蛟滋事提督於光緒二年正月奉札馳抵辦理初到時以解散爲主當會同委員王元晉等出示曉諭捆獻首惡罔治脅從旋卽解散大半惟袁廷蛟與其夥黨分據寨硿三月初三日卑營按兵未動詎該匪袁廷蛟約數百人撲至卑營住紮官渡場口方纔出隊接仗擊退追上山梁始行敗歸各寨其撲營情狀與匪眾多寡求訊地方在案人證便悉初五日提督率軍攻尖峯自辰至未寨中飛石抵禦弁勇多有傷亡破寨自多殺戮並未殺老弱婦孺撲巖墜死者有之委員慶善所查趙姓數人傷而未死係破寨後短兵相接互有殺傷並非妄殺無辜至千金硿經律武營攻破外硿後提督於三月初九日前往

在宋家坪帶有羅心仁等至該硐開導初十日午刻大衆投誠出硐老弱婦女下山天晚內有朱姓數家約各投誠之衆在宋登泰家住宿一夜均於次早有李金都等帶領各自回家現有李金都等可質惟攻破尖峯寨時有游勇乘亂搶牛馬提督當拏獲游勇張中彪李敦昌吳成玉等正法今將牛馬暫關禹王宮廟內傳令民家均悉該場團約領去有該場團約可訊至委員慶善在太和鎮所遇女眷係提督胞弟四川候補道李嶽恆之眷口甫由湖南來川取道小川北晉省沿途誤指爲提督家眷提督實無此事再提督印示內僅有攻破尖峯各寨殺斃無數兇橫之語並無搜殺字樣是實各等供正逐日研訊間接據委員

候補知府熊紹璜等將查明情節逐款稟呈前來隨查稟呈內開查得袁廷蛟又名袁三級係東鄉十二甲人曾充該縣白役斥革同治十三年因征收錢糧京控解川提省訊明斷結解縣管束中途逃歸光緒元年五月間該前縣長廉任內在鄉邀集千餘人各持槍礮旗幟踞紮縣城對河山上稱欲清算糧帳長廉閉城防守稟經前綏定府易蔭芝前往彈壓袁廷蛟偪減糧價易蔭芝爲安民起見照呈減收地丁等項所有捐輸一項該縣年來均係派銀五千兩之數民閒尙無異議當卽飭令照常征收統歸縣官辦理不再設局委紳被控各局紳候飭縣勒傳解府清算歷年津捐各帳令該民等均各解散易蔭芝稟明前督

臣

吳棠以其均係糧民未經懲辦嗣後局紳等先後赴府投到惟袁廷蛟屢次給限延不赴質維時李金良因袁廷蛟倡首圍城並在各處訛索慮恐牽累曾設法捕拏袁廷蛟忿恨又聞官渡花行鹽店曾出錢雇人幫捕因糾邀會匪吳奉山臬匪馬洪崙等糾眾將李金良等家暨鹽店花行一併打毀掠取財物並以前年該縣議辦次年捐輸該縣官紳並不遵照向章於四千二百文之外加派錢五百文又復設局經營袁廷蛟遂播惑鄉愚使皆聽其號召孫定揚移請汛弁許安國前往彈壓嗣又稟府發兵派千總楊開泰等帶兵百名前往許安國因畏其人眾乘閒逃回楊開泰等於二年正月初二日行至距官渡場四十里之雙

河口兩面皆山忽有千餘人徧山吹筒蔡啟祥告以係本府發來營兵期在了事鄉民不信謂係局士王宗恩私雇要將軍裝留下蔡啟祥等分說不清只得依將號衣旗幟器械馬匹拋下而去孫定揚卽以蔡啟祥等被圍不知下落縣城危在旦夕等情通稟請兵援勦吳棠調派虎威各營前往攻勦文格到任後恐被脅之民枉遭殺戮又檄委王元晉周瀚前往會同各營相機辦理勦撫兼施二年二月二十四日虎威各營與王元晉等至縣先出示諭令捆獻首惡罔治脅從鄉民安業被脅之衆大半解散惟袁廷蛟與其黨分據寨硿二十五日劉道宗住紮官渡場派勇獲匪王英祥到營袁廷蛟率王姓族衆百人並鄰近數十

人於三月初三日各帶旗幟器械在該營後山梁頂上大聲吶喊索放王英祥喧呼一時之久劉道宗帶勇抄殺上山袁廷蛟敗潰勇丁獲殺王石匠一名燒燬房屋數十間初十日該場團首導引劉道宗之勇往攻寨子梁烏觜寨紅巖寨人皆逃避只殺趙元爵等二人燒燬房屋十數間豬牛大半搜盡初五日李有恆親率兵勇往攻尖峯寨寨中飛石抵禦自辰至未官渡場團首引勇由寨後高巖小路扒進殺斃及投巖約死者三百人半係老弱婦孺逃出者約百餘人燒毀房屋百餘間初七日雷玉春帶律武營勇圍攻千家碕卽千軍碕殺傷男女四十餘名燒毀民房四十餘間所有豬牛搜索一空是日營中押有婦女數十

人係在袁家塩宋姓關住三日始行放回先是劉道宗到官渡場帶有家眷曾在方信立家居住其虎威營勇砍傷趙姓數人抱龐姓幼子均有其事至原參李有恆裝載所擄婦女數船而去又將呈訴多人一律捆斬並其子弟偪姦民婦被辱遂縱勇報復及官渡場期商賈貨物一併殺擄暨掩殺太平縣民人分投密查實無其事各等情隨將該委員等所查情形參合案卷並與現訊各供逐款確核其所查紳民人等被袁廷蛟勾匪燒搶估索各情核與紳士王宗恩民人吳芳體等所供脗合又所查前任綏定府知府易蔭芝東鄉縣知縣長廉暨前委員王元晉周瀚等前後辦理各情亦與各該員等所供無異惟查明袁廷蛟

糾衆句匪圍城燒搶拒敵官兵核之袁廷蛟所供其於糾
衆句匪圍城各節大致均屬相符而燒搶拒敵一層與袁
廷蛟供尙不合又所查孫定揚擅改定章浮收錢文及雷
玉春劉道宗李有恆等破寨擄殺各情亦與孫定揚劉道
宗等供間有不符復督同兩司委員再將全案人證詳加
研訊該紳士王宗恩龐大生民人吳芳體李開邦等暨前
綏定府知府易蔭芝東鄉縣知縣長廉前委員王元晉周
瀚等供仍如前復提袁廷蛟詰以當日糾衆圍城既係爲
浮收算糧起見當日綏定府下縣查辦已將錢糧照章征
收並將局士解府質算卽應迅速退散人衆赴府對質何
以各局士到府後屢次給限抗不赴郡仍逐日帶領多人

在鄉尋紳糧生事卽就現供尋李金良而李金良逃避卽在其家住紮尋太林孝而太林孝潛藏卽將其門打毀尋王宗恩而王宗恩搬逃卽將其屋焚燒此等兇暴情狀人共畏已可概見至官渡旣未撲營則所稱劉道宗派勇出隊接仗所接何仗又將向誰接仗旣稱出隊接仗是必先經撲營可知何能狡辯至綬定營兵丁被圍奪去軍裝馬匹此綬定府闔府官兵百姓人所共見何從掩飾再三究詰袁廷蛟俯首無詞自甘治罪復提訊孫定揚詰以袁廷蛟糾衆滋事句匪燒搶始終藉口算糧而東鄉歷任征收確係浮多該縣卽因匪勢日衆稟請派兵亦應將藉糧滋事聲明具稟乃竟抹置藉糧一層直以匪徒糾衆滋事

縣城危在旦夕稟請援勦况袁廷蛟既藉糧起事該縣議派次年捐輸既不照易蔭芝定章辦理乃於前數年征收之外又多加五百文而於人心惶惑之時該縣又復設局募勇令團首議抽斗米一升致袁廷蛟愈得煽聚此皆有該縣原稟及易蔭芝等所稟存卷身爲厲階此時何能強辯孫定揚俯首無詞又提訊雷玉春詰以該總兵帶隊攻破千金峒據該營當日稟報係用火攻甚急該匪力窮各持刀槍衝出該營奮勇直前殺斃悍賊多名生擒數十人卽提督李有恆稟是日亦帶隊到彼實見殺斃悍賊數十人撲巖墜死亦多等語今只稱攻破該峒拏獲匪黨數人則以前所稟又將何說雷玉春亦自知認咎又提訊劉道

宗詰以當日出隊圍攻尖峯寨現供袁廷蛟等於官渡敗退後羣匿其中該提督隨同李有恆因急拏袁廷蛟不得不帶隊搜索因該寨飛石抵禦鏖戰數時始將寨攻破殺斃二百餘人撲巖墜死者甚多是殺斃由於抗拒當日皆稟報有案無庸置辯惟該提督自稱攜眷隨營並無其事茲據委員查明當日攜眷在營現有所住方信立家可證何能狡強至所供抱去龐姓幼孩查係該前營百長賀元林之胞兄賀喜林以錢二千布一疋向龐姓買抱爲嗣雖非擄掠然賀喜林並非營勇聽其混迹營內亦有疏縱之咎劉道宗亦無可置辯又提訊李有恆詰以該提督當初奉札辦理袁廷蛟一案查核原札本係飭勦匪類不知爲

藉糧聚衆該提督到東鄉後以安撫爲主與前委員王元
晉等曉諭解散專拏首惡罔治脅從現有原稟及示稿在
卷惟該提督旣知專拏首惡何以於袁廷蛟所在竟不能
設法查出實屬疏忽至官渡擊敗後衆人羣踞尖峯寨固
守劉道宗等率隊搜索勢所必然又因該寨飛石抵禦攻
戰多時始將寨打破遂致殺斃二百數十人撲巖墜死者
有之揆情酌理在該提督則索匪甚急在該寨則無知抗
拒彼此相持殺傷過衆實在意中惟破寨之後搜擄牛馬
該提督現稱實有其事但實係游勇所爲該提督當日已
拏獲張中彪李敦昌等正法並將所擄牛馬逐日還交團
約分領固屬有卷可查惟此事姑無論擄掠未必盡屬游

勇所爲卽果係游勇而各營之紀律不嚴該提督亦咎有應得且劉道宗以管帶之員攜眷隨營該提督亦不能查實辦理草率疏忽之咎更何所辭李有恆亦無從置辯臣復查此案事隔年餘供詞各執殊難定讞幸全卷具在其滋事之始末辦理之情由皆有呈詞稟報及札文書函各件歷歷可考非可僞爲且事關重大虛實一切昭然共覩非同曖昧可以掩飾由此虛衷查辦真僞自可立分臣數月以來確核卷據詳採輿情又參以委員等所查節略確知起釁之由實緣東鄉縣歷前任征收錢糧多有浮收袁廷蛟身爲革役人素狡猾遂得藉口算糧陰圖斂費然當其糾衆滋事之初已經前任綏定府知府易蔭芝准減照

舊章征收當時若將浮收之地方官撤參一面認真解散鄉民一面密拏袁廷蛟照例嚴懲已可無事乃既不查明所糾之衆是否實已解散又不能查拏袁廷蛟懲辦聽其逐日帶領多人沿鄉滋擾迨署東鄉縣知縣孫定揚到任後請兵勦辦彼時若將袁廷蛟聚衆算糧一節聲明稟報則派勇一二營前往彈壓另揀妥員查明分別辦理亦不致遽釀事端乃孫定揚置藉口算糧於不問直以匪徒滋事縣城危急等語張皇稟請援勦前督臣吳棠竊恐蔓延爲害意圖速勦以靖地方遂派撥兵勇至四千餘人之多又嚴檄各營迅圖埽盪迨李有恆等到東鄉後知爲藉糧聚衆亦以安撫爲主與委員王元晉等出示曉諭只拏首

惡不治脅從各鄉民尙無十分驚疑而孫定揚於議派次年捐輸不惟不遵舊章轉較各前任征收之數又多加錢五百文以致袁廷蛟益得藉煽鄉愚惡心愈熾雖經李有恆與王元晉等多方出示安撫諭令捆獻袁廷蛟而愚民受惑甚深迄無一應於是袁廷蛟蹤迹愈密屢查無著而李有恆等勇營仍是按兵不動迨後孫定揚又於人心疑懼之時復在官渡設局募勇議抽斗釐以作勇費遂致圍局被搶而袁廷蛟乃有在官渡撲營之事至撲營之衆被勇擊敗於是鄉民皆疑官兵爲痛勦遂相率守寨官兵亦疑鄉民爲拒敵始用力圍攻攻者愈急守者愈固疑極生忿而殺戮遂至數百人此實此案滋事之原委亦卽此案

定斷之權輿也現在各人證均無異詞應卽衡情定斷就案議結此案袁廷蛟以一革役始則藉糧糾衆圍城偪脅官長繼復勾匪燒搶圍困官兵奪去軍裝馬匹罪應擬斬嗣又率衆執持器械旗幟偪近劉道宗住紮官渡勇營後山喧呼據供劉道宗派勇出隊接仗既有仗可接則其撲營已無疑義且其滋事各情前獲匪吳奉山等十餘人均供明在案訊後衆證環質供指如繪又有簿據信片足據實屬兇狡衆著袁廷蛟應請照不服追喚拒敵官兵以謀叛已行論謀叛已行者斬律擬斬立決以昭炯戒署東鄉縣事慶符縣知縣孫定揚於綏定府改定征收之後議派捐輸銀兩不遵舊章於每糧一兩加增錢五百文辦事實

屬顛預雖甫經議定尙未征收辦理不善咎已難辭嗣又抹置算糧一層直以匪徒滋事縣城危在旦夕張皇請勦以致視同軍務派動大兵繼復以募勇抽收斗釐致激匪衆搶局撲營釀成大事尤爲荒謬孫定揚應請卽行革職從重發往軍臺效力贖罪惟據該員供稱其母現年八十三歲是否親老丁單應俟飭查明確再行核辦管帶虎威前營記名提督劉道宗管帶律武中營記名總兵雷玉春率勇往攻尖峯寨千金峒等處係探聞袁廷蛟常在各該寨峒來往往住紮經日久查拏無蹤而各寨峒又皆關閉固守勢不能不前往搜捕而各寨峒又不聽曉諭尖峯寨則飛石抵禦千金峒則持刀拒敵均屬攻戰多時始行破入

雖殺傷甚多究因搜索匪首各寨峒擅行抗拒彼此互戰所致律以妄殺似覺過當惟各該處牲畜均有被擄情事是勇所爲是匪所爲幾至無從辨別其紀律不嚴已難辭咎且劉道宗復有攜眷隨營一事尤干軍律劉道宗應請卽行革職照軍人擄掠將領知情故縱者與犯人同罪至死減一等律於擄掠勇丁斬罪上減一等應請杖一百流三千里係職官從重發往新疆效力贖罪雷玉春於勇丁擄掠牲畜不能查出嚴辦應卽照軍人擄掠本管頭目鈐束不嚴杖八十留任律擬杖八十留任以軍律論仍從重卽行革職發往軍臺效力贖罪以示懲儆本任東鄉縣知縣長廉雖在任時尙無浮加錢糧情事惟承各前任違制

遞加之後該縣不能早爲革除以致袁廷蛟得以藉口糾衆圍城迫經起事又不能立時查拏懲辦實屬疲輒統領虎威營提督李有恆於辦理此案雖係迭奉嚴札勦匪且到東鄉後卽經會同委員等出示安撫專拏首惡不治脅從迫袁廷蛟久索不獲而官渡又經撲營鄉民羣相閉寨該提督急於獲匪勢必率隊搜索而鄉民無知抗拒以致攻寨互戰多有殺傷卽該營弁勇亦傷亡三十餘名此時酌理衡情似未便遽科以重罪卽勇丁搜殺姦擄各情查明該提督實有正法擄掠游勇多人並清還各戶牛馬實據其無縱容搜殺姦擄可知其前慶善所指爲該提督家眷查係該提督胞弟四川候補道李嶽恆之眷口由湘來

川取道小川北進省沿途誤指稱爲該提督家眷其實並無攜眷隨營之事今據委查皆同似無狡飾惟身爲統領不能整飭營務於所部劉道宗攜眷隨營管帶勇丁毫無紀律均無覺察實屬溺職應與長廉均照溺職例革職東鄉縣汛弁許安國綬定營千總楊開泰世職蔡啟祥於袁廷蛟滋事帶兵前往查辦並不設法解散因畏其人衆輒卽潛逃並將軍火器械馬匹拋棄實屬庸懦無能許安國楊開泰蔡啟祥均請一併斥革以示懲儆謝思友於袁廷蛟糾衆撲營時已奉札拔隊起程回省並未隨同各營攻勦應毋庸議候補知府王元晉兩次奉札飭查李有恆被參各節查明實無其事與委員所查均屬相符惟該員於

袁廷蛟滋事係爲鬧糧起見及帶兵官縱容擄掠各情未能卽時稟報究屬疏漏候補知縣周瀚於李有恆被參各節並未奉札飭查其署東鄉縣任內已將征糧一事核實減收並無不合惟身當委員查辦事務於袁廷蛟滋事係爲鬧糧起見及帶兵官縱容擄掠各情亦未經卽時稟報亦屬疏忽王元晉周瀚均應請交部查議前任綏定府知府易蔭芝辦理此案查無操切情事惟袁廷蛟聚衆圍城旣諭令解散究竟已否解散未經查實且不立時設法拏獲懲辦亦屬顛預業已降爲通判應免置議局士王宗恩與民人吳芳體等經收捐輸均係繳官承解確查並無勒派浮收情事且均受袁廷蛟之害甚重卽陳憲高亦係被

袁廷蛟逼脅前往嗣袁廷蛟在鄉滋抗均未同去情實可
原應一並省釋以省拖累前督臣吳棠辦理此案實以東
鄉向多圍城滋事之案深以地方爲重於稟報到時不及
詳查遂派重兵並嚴札各營迅圖勦辦以免釀成大事雖
爲慎重地方起見究覺辦理未協自應交部議處前護督
臣文格並無徇庇李有恆情事卽辦理此案查核迭次批
札均令勦撫兼施係屬正辦並無不合惟於劉道宗攜眷
隨營一節其先未能查出不無疏略應請交部察議惟前
督臣吳棠現已病故應否免其置議護督臣文格前已自
請議處應否

加恩寬免之處伏候

聖裁所有遵

旨查辦東鄉匪徒袁廷蛟聚眾滋事一案帶兵官有無縱
勇妄殺姦擄各情現就委員查明情形參核案卷並現訊
供情據情分別擬議各緣由是否有當理合恭摺具陳伏
乞

皇太后

皇上聖鑒訓示謹

奏